

**Kalaallit Nunaanni akileraartarnikkut utertitassat ernialerneqartarnerat maannakkut 4%-
iusup 2%-imut appartinneqarnissaanik Naalakkersuisut inatsisissamik
siunnersuusiornissamik peqquneqarnissaanik Inatsisartut aalajangiiffigisassaattut
siunnersuut**

pillugu

Akileraartarnermut Akitsuusiisarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Akileraarnermut Akitsuusiisarnermullu Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq, Niels Thomsen (siulittaasoq)
Inatsisartunut ilaasortaq, Harald Bianco (siulittaasup tullia)
Inatsisartunut ilaasortaq, Aqqaluaq Egede
Inatsisartunut ilaasortaq, Karl Lyberth
Inatsisartunut ilaasortaq, Jens Imanuelsen

Siunnersuummik siullermeerineq tunngavigalugu siunnersuut matumani pineqartoq Akileraartarnermut Akitsuusiisarnermullu Ataatsimiititaliamit misissorneqarpoq.

Siunnersuutip imarisaa

Akileraartarnikkut utertitassat ernialerneqartarnerisa 4 procentimit 2 procentimut appartinneqarnissaa pillugu inatsisissatut siunnersuummik Naalakkersuisut suliaqarnissaat siunnersuuteqartup kissaatigaa.

Siunnersuutip Inatsisartunit siullermeerneqarnera

Ernialersuinerup 4 procentimit 2 procentimut apparneratigut nunatta karsiata sipaaruteqarsinnaanera tunngavigalugu **Inuit Ataqtigiit, Demokraatit Kattusseqatigiillu Partiiata** siunnersuut taperserpaat. 2 procentimik ernialersuineq aningaaserivinni nalinginnaasumik toqqortikkat ernialersugaanerannit suli qaffasinneruvoq. Tamatuma saniatigut erniap appartinneratigut iluanaarniapiluttoqarsinnaanera annikillisinneqarsinnaavoq.

Siumup Atassutillu siunnersuut tapersersunnigilaat, tassa isumaqartoqarmat innuttaasunut akileraarutunik akiliivallaarsimasunut 4 procentimik maanna ernialersuineq naammaginarpoq. Tamatuma saniatigut maanna ernialersuinerup iluanaarniutigineqartarnera qularnarpoq.

Naalakkersuisut

Inuiaqatigiinni ernialersuinerup maanna annikinnera akileraarutitigut akiliutigivallaarsimasat erniaasa appartinneqarnerannik ingerlaannartumik kinguneqartariaqanngitsoq Naalakkersuisut isumaqarput, tassa ernialersuineq qaffaqqeratarsinnaammat. Tamatuma saniatigut iluanaarniapiluutigineqarsinnaanera killeqarpoq.

Akileraartarnermut Akitsuusiisarnermullu Ataatsimiititaliap siunnersuummik suliarinninnera

Iluanaarniapilussinnaaneq pillugu

Maleruagassat siunnersuuteqartumit allanngartikkumaneqartut akileraaruserinermik ingerlatsineq pillugu Inatsisartut inatsisaanni nr. 11-imi, 2. november 2006-imeersumi kingusinnerusukkullu allanngartinneqartumi, imm. 2-mi allassimapput, taannalu ima oqaasertaqarpoq:

”Imm. 2. Akileraarutit sippuutaannik utertitsinermi akileraartussaataasooq aningaasat 4 procentiannik taartisiaqartinneqassaaq. Akileraarutit sippuutaasa aningaasat nammineq piumassutsimik akiliutigineqarsimasut naligippatigut taartisiaqartitsisoqassanngilaq.”

Issuaanermi takuneqarsinnaasutut akiliivallaarsimaneq nammineq piumassuseq aallaavigalugu pisimappat taartisiaqartitsisoqarneq ajorpoq. Iluanaarniapiluttoqarnissaanut illersuut taanna aningaasarsianit akileraarutit pillugit inatsimmik 1999-imi allannguinikkut atulersinneqarpoq (UKA 1999/17). Tamanna tunngavigalugu akileraartarnermut oqartussaasunut nammineq piumassuseq naapertorlugu akiliuteqartarnikkut iluanaarniapilussinnaaneq killilerujussuusoq ataatsimiititaliamit oqaatigineqassaaq.

Sipaaruteqarsinnaaneq pillugu

Ukiuni 2002-mit 2008-mut akileraarutininut akiliivallaarutit pillugit Akileraartarnermut Aqutsisoqarfik ataatsimiititaliamut ima paasissutissiivoq:

Ukioq	Akileraarutininut akiliivallaarutininut tapiliussat (erniat)
2002	3.351.000 kr.
2003	3.108.000 kr.
2004	3.127.000 kr.
2005	3.848.000 kr.
2006	4.863.000 kr.
2007	6.087.000 kr.
2008	6.773.000 kr.

Tassunga atatillugu piffissamut 2002-mit 2006-imut kisitsisit akileraarutininut akiliivallaarutit pillugit kommunit nalunaarutaat tunngavigalugit aammalu 2007-imi 2008-milu kisitsisit Akileraartarnermut Aqutsisoqarfimmit tapiliutitut tunniussaarpiaartut tunngavigalugit naatsorsorneqartut Naalakkersuisut paasissutissiissutigaat.

Tunniunneqartartut amerliartornerannut akileraarutigineqartut amerliartornerat pissutaasoq Naalakkersuisut paasissutissiissutigaat. Inuiaqatigiinni akissarsiat akillu qaffakkiartorpata akileraarutininut akiliutit taamaaqataanik amerlissapput.

Tamatuma saniatigut akileraaqatigiittarnerup taamaatinneqarnera 2007-imit 2008-mut qaffariaammut pissutaasoq Naalakkersuisut nassuiaatigaat, tassa aappariit akileraaqatigiittarnerup

atorunnaarneranik eqqumaffiginnissimanngitsut aapparisartik aqputigalugu akileraarutitut akiligassaqalersimasinnaammata tamatumalu peqatigisaanik aappaa aapparisani aqputigalugu akiliivallaaruteqarneq pissutigalugu utertuugassaqalerluni.

Naalakkersuisut paasissutissiissutaat ataatsimiititaliamit tusaatissatut tiguneqarput oqaatigineqassallunilu akileraartarnikkut utertitassat ernialerneqartarnerisa 4 procentimit 2 procentimut appartinneqarnerat nunatta karsiata akileraarutitut akiliivallaarutitut tapiliutitut aningaasartuutai ukiumut 3 mio. kr.-it missaannik appartinneqarsinnaanerat naatsorsuutigineqartariaqartoq.

Akileraartarnermut Akitsuusiisarnermullu Ataatsimiititaliap inassuteqaataa

Siuliani oqaaseqaatit siullermeerinermilu oqaaseqaatit tunngavigalugit ataatsimiititaliami amerlanerussuteqartut, **Inuit Ataqtigiit Demokraatillu** siunnersuut **akuerineqassasoq** inassutigaat.

Ataatsimiititaliami **ikinnerussuteqartut**, **Siumut** siunnersuut itigartinneqassasoq inassutigaat.

Taama oqaaseqarluni Akileraartarnermut Akitsuusiisarnermullu Ataatsimiititaliap siunnersuut Inatsisartunut aappassaaniigassanngortippaa.

Niels Thomsen
Siulittaasoq

Harald Bianco

Aqqaluaq Egede

Karl Lyberth

Jens Imanuelsen